

**SETSWANA**

**3158/02**

Paper 2 Literature

**October/November 2017**

**1 hour 30 minutes**

No Additional Materials are required.

**READ THESE INSTRUCTIONS FIRST**

An answer booklet is provided inside this question paper. You should follow the instructions on the front cover of the answer booklet. If you need additional answer paper, ask the invigilator for a continuation booklet.

Answer **four** questions:

In Section A, answer Question **1** or Question **2**.

In Section B, answer Question **3** or Question **4**.

In Section C, answer **two** questions: Question **5** or Question **6**, **and** you must answer Question **7**.

The number of marks is given in brackets [ ] at the end of each question or part question.

**BUISA DITAELO TSE PELE**

O neetswe bukana ya go arabela ka fa gare ga pampiri e ya tlathlhubo. Latela ditaelo tse di mo sebipong kwa tshimologong ya bukana ya go arabela. Ditaello di neetswe gape le ka Setswana fa tlase. Fa o batla pampiri e nngwe gape ya go arabela, kopa molebeledi go go neela bukana ya go tsweletsa.

Araba dipotso di le **nne**:

Mo go Karolo ya A, araba Potso ya **1 kgotsa** Potso ya **2**.

Mo go Karolo ya B, araba Potso ya **3 kgotsa** Potso ya **4**.

Mo go Karolo ya C, araba dipotso di le **pedi**: Potso ya **5 kgotsa** Potso ya **6**, **mme** o tshwanetse go araba Potso ya **7**.

Palo ya maduo e supywa mo masakananeng [ ] kwa bokhutlong jwa potso nngwe le nngwe kgotsa karolo ya potso.

**DITAELO TSA BUKANA YA GO ARABELA**

Tlatsa mabokosana a a leng fa pele mo sebipong sa bukana ya go arabela o dirisa ditlhakagolo. Kwala ka pene e e botala jwa loapi jo bo tseneletseng kgotsa ka pene e ntsho. O **SE KE WA KWALELA FA GODIMO GA DIBARAKHOUTU**. Kwalela dikarabo tsa gago ka mo bukaneng ya go arabela. Dirisa matlhakore otlhe a pampiri. Tlogela mela e mebedi e e sa kwalwang sepe mo magareng ga dikarabo tsa gago tsa potso nngwe le nngwe.

Kwala nomoro ya potso e o e arabang mo morathong wa ntlha/kholomong ya ntlha.

Question	Part
1	ai
1	aii

Fa e le gore potso e o e arabang e na le dikarolo, sekao 1a, kwala karolo ya potso ka mo morathong wa bobedi/kholomong ya bobedi.

Fa e le gore o dirisitse dibukana tsa go tsweletsa, tsweetswee di tsenye ka mo teng ga bukana ya go arabela.

This document consists of **7** printed pages, **1** blank page and **1** Insert.

**Section A****KAROLO A: KHUTSWE/PADI**

Ela tlhoko: Kwala boleele jwa tsebe le seripa mo potsong nngwe le nngwe.

**Araba Potso 1 kgotsa Potso 2.****1** *Fa a lelela legodu* – P.T.M. Marope

Le fa go twe dikgaba tsa batsadi! A mme se se diragaletseng Neo se a dumelesega? Araba o ntse o itshetlegile ka ditiragalodikgolo tsa padi e.

[25]

**Kgotsa****2** *Diselamma* – T.K. Mouwane

“Ngwana yo o sa reetseng molao wa batsadi o tla reetsa wa manong”. Mmaagwe Dipogiso o mo kgwetse mathe ka fa leganong go le kanakang gore Dipogiso a mo reetse thata jaana ntswa a bona go se siame ga dikeletso tsa gagwe? Anaanela ka botlalo o itshetlegile ka ditiragalodikgolo tsa padi e.

[25]

**Section B****KAROLO B: MOTSHAMEKO/TERAMA**

Ela tlhoko: Kwala boleele jwa tsebe le seripa mo potsong nngwe le nngwe.

**Araba Potso 3 kgotsa Potso 4.****3** *Mmoko wa talane* – T.K. Mouwane

Supa tsela e maemo le lenyatso di tlhodileng kgotlhang mo terameng e? Araba o ikaegile ka dintlha tse di latelang:

- Tshimologo
- Tlhaologo
- Phuthulogo
- Tsielego
- Setlhoa
- Tharabologo
- Bokhutlo

[25]

**Kgotsa****4** *Pelo e ja serati* – J.M. Ntsime

Supa ka mo setso le lorato lwa go batlelwa molekane le tlhodileng kgotlhang mo terameng e. Araba o ikaegile ka dintlha tse di latelang:

- Tshimologo
- Tlhaologo
- Phuthulogo
- Tsielego
- Setlhoa
- Tharabologo
- Bokhutlo

[25]

## Section C

## KAROLO C: POKO

## Araba Potso 5 kgotsa Potso 6 le Potso 7.

5 *Borobe jwa puo* – M.R.T. Makgeng

Bala leboko le le latelang morago o arabe dipotso tse di tlhagelelang kwa bokhutlong jwa lona.

**Tsa loapi**

Batswana tlhwaang tsebe lo reetseng  
 Batswana reetsang jaaka ke tserema  
 Ke kgorotlha ke tsatsanka tepo-loapi.  
 A re buseng matlho a rona re boneng  
 A re gadimeng re bone matswakabele.

Kana tepo-loapi re e reile mainaina  
 Bangwe ba re ke “Bo-ramaaka”  
 Bangwe ba re ke “Digabogabo fale le fale”  
 Ke pipidi ya rona Batswana, a re se e nyatseng.  
 A re se e nyatseng re rotloetse, tsema le thata ka mong.

Mma-Ramotshwa o di gadike ka koo  
 O di gadike le bana ba gago, Batswana ba bone.  
 Ba difofane lo ikanye Mma-Ramotshwa  
 Lo mo ikanye ke ene tsela le boammaaruri  
 Ke motswedi wa maemo a bosa a ‘fatshe leno.

Ka Sejatlhapi ba re “Weather Bureau”  
 “Weather Bureau” o belege setšhaba sa Botswana.  
 Go le temo, go le mesepele, ke wena.  
 Le kgwanyape re tla re lebeletse wena  
 Le tudumanyetsa boatleng re reeditse wena.

Ngwana o sa le leng o swela tharing  
 Tepo loapi kana mmueledi palamenteng o a leka  
 Sebe sa phiri ditlamelo di tla ka boutsana  
 Ditlamelo kana o ka di newa ka mmetela,  
 Tiro yone o ka e dira ka maatlametlo.

E re e tsentse tlhako kgamelong, ba go gopole  
 Merwalo e nne bokete magetleng a gago  
 Dikgobo le dikgalo tsone di se kana ka sepe,  
 Puo jaanong e nne “Ba kae ba tepo-loapi”?  
 Ntswa ditlamelo ba sa di go naya.

Kwa bokhutlong gopolang itsholelo Batswana  
 Itsholele ya rona e sa le kwa tlase  
 Ditlamelo tsone ga di mmogo,  
 Aferika-Borwa ditlamelo gone di mmogo  
 Ka jalo ba nepa tsa tepo-loapi.

- (a) Mela e mebedi ya temana ya ntlha ya leboko le e bua ka ponagalo efe ya poko? Tiro ya yona ke efe? [2]
- (b) Neela mainaina a le mane a a reilweng tepo-loapi? Goreng? [4]
- (c) Tlhalosa ka botlalo go tswa mo lebokong gore goreng batho ba ikantse tepo-loapi? Neela dintlha di le nne fela. [4]
- (d) Go tewa eng fa go twe “e tsentse tlhako kgamelong”? [2]
- (e) Tlhalosa ka bokhutshwane ka mo mmoki a dirisitseng tshegiso mo lebokong le? [3]

[Maduo otlhe: 15]

## Kgotsa

### 6 *Motlhaolosa* – M. Moreri

Mmoki mo lebokong le, o dirisitse metlhala e e farologaneng go tlhagisa botshwantshi ka ga lorato. Supa metlhala e mme o e tlhalose ka botlalo gore e amana jang le lorato.

#### Lorato

Dumela lorato ramafaratlhatlha  
 O ka bo o rekwa seborokgwe ka go reka  
 O bopiwa senkgo ka go ipopela boretšhana  
 O adingwa semadi ka go ikadimela tšharope  
 Kana phiriso ka go iphirisetsa sentlo  
 Wa tswa sekgomaredi wa mmatama semotu.

O ka bo o le leswalo ka go tshuba kgapetsa  
 Lenko la gago le le monate la ela sethong ka metlhala  
 Bodupa jwa gago jwa nna bogoma sengaparelabatho  
 Ga apewa ka wena, wa thutafatsa setho, wa se bonesetsa  
 Ganong wa nna letswai, ka wena ga šajwa dikgang

O ka bo o le peo ra go lema tshimong ya ga Rabi  
 Ya re go phakisiwa “namola leuba” ra go phakisa “namola tshele”  
 Tsa ‘go dikungwa ya nna bokamoso, bonolo le kagiso  
 Kgogolammoko a gogolela tshele le tshebi mmadiforetsheke  
 Sephai a phailela kgatelelo le patiko kgakalakangakala  
 Dikgafela kgosing ga isiwa popagano le tshepano ka disigo

O ka bo o busa re kabo re go tlhoma Tautona lefatsheng  
 Wa nna mokonateledi wa gaisa Herota le Hitlelara  
 Mephato ya gago ya thankgola kilo le matona a gagwe  
 Wa ‘go molao-motheo ya nna “Bakorinthe wa ntlha kgaolo 13”  
 Motsamaisa dipuisano palamenteng ya nna moilakilo  
 Moatlhodi le ramasole ga bewa ba rata Thamaga

[15]

7 Tlhalosa boitumelo jo mmoki a itumeletseng letlhabula ka jone mo lebokong le.

**Letlhabula**

Ke utlwile banyana ba seba maloba,  
Ba seba ba re ba otlala dina le meno,  
Ba nole mothubiso go thubisa mala,  
Gonne letlhabula o gorogile maabane,  
Kgoro e mpa tse pedi go tlala.

Letlhabula kana o maatlametlo  
O atlametlile dikhutsana le masiela,  
O ba ntshitse tlala borole go pharama,  
'Bapalo tsa naga di tletsetletse meraba,  
Magapu, ntšhwe le maowane ke letlepu,  
Banyana ba itumeletse legodu la makgomane.

Kana letlhabula ke nako ya kgora,  
Nako ya go ja mpa mpolae ke a lora,  
Ke lora ke tlhabile kgobe ka mmitlwa,  
Meriting wa motlopi ke e nwa ntšhwe,  
Nyebu e kabusela isong go e ja photla,  
Kana ga ke lore ke kano ya 'tlhaba.

Kana letlhabula ke nako ya gwetla,  
Nako ya kgwedi tsa Tlhakole, Mopitlwe le Moranang,  
Tlhakole a tlhakola mabele mmudula,  
Mopitlwe a bitla mabele ditlhoka,  
Moranang a nawa di ungwa di a nama,  
Phosokgolo ya gago ke go bulela mariga.

[10]

**BLANK PAGE**

---

Permission to reproduce items where third-party owned material protected by copyright is included has been sought and cleared where possible. Every reasonable effort has been made by the publisher (UCLES) to trace copyright holders, but if any items requiring clearance have unwittingly been included, the publisher will be pleased to make amends at the earliest possible opportunity.

To avoid the issue of disclosure of answer-related information to candidates, all copyright acknowledgements are reproduced online in the Cambridge International Examinations Copyright Acknowledgements Booklet. This is produced for each series of examinations and is freely available to download at [www.cie.org.uk](http://www.cie.org.uk) after the live examination series.

Cambridge International Examinations is part of the Cambridge Assessment Group. Cambridge Assessment is the brand name of University of Cambridge Local Examinations Syndicate (UCLES), which is itself a department of the University of Cambridge.